

四庫全書

集部

欽定四庫全書

集部

稿李詩繫卷二十三

詳校官侍講_臣王燕緒

主事銜_臣徐以坤覆勘

總校官進士_臣朱鈐

校對官修撰_臣吳錫齡

謄錄監生_臣葉大奇

欽定四庫全書

稿李詩繫卷二十三

平湖沈季友編

國朝

倦圃先生曹溶

溶字潔躬號秋嶽平湖人居秀水崇禎丁丑進士
由行人授御史入

本朝以御史視學畿內歷副都御史戶部侍郎外轉廣

東布政使後降補山西陽和道裁缺還里甲寅逆藩叛
閣臣薦為邊才隨征福建丁母憂不受職而歸戊午以
宏博徵復薦修明史俱辭不赴乙丑八月卒年七十
三溶天性梗直為御史劾輔臣謝陞削籍熊開元密
叅周延儒廷杖溶疏白其寃甲申為流賊所執拷掠
三晝夜委廐中得不死後任副憲時遇熱審多平反
居塞上五年歲饑力請賑救生平長於經濟未竟其
用乃獨肆力於文章諸體雄駿而尺牘尤多長牋小

幅人爭寶之其詩源本少陵蒼老之氣一洗嫵調
與合肥龔鼎孳齊名世稱龍曹晚年自號鉏耒翁
築室范蠡湖顏曰倦圃時花種竹置酒倡和無虛
日愛才若渴四方之士倚為雅宗者四十年家多
藏書勤於誦覽嘗以明季門戶紛爭是非失實輯
續獻徵錄六十卷又痛崇禎朝輔相失人著五十輔
臣傳五卷外有靜惕堂詩文集三十卷年來予每
從倦圃遊始歎先民風流未墜茲錄其詩概置已

刻者惟取閩遊集及癸亥迄乙丑之作用冠斯卷
一代鉅公足以起衰式靡矣

下建溪諸灘

辭家違素心薄質困戎輅水宿以圖安涉險豈復怖挂
席繇浦陽連旬溯風霧割嶺置洪潭居卑向誰訴劍戟
起搏人犀利不可忤偃者類牛馬掉尾飲而顧茹波隨
瀉之噴沫鼓餘怒吹舟捷若浮長風那足慕翕忽構盤
渦巨壑躡前路捩柂屢折旋簸舞慎所措爰悟乘勢巧

趨避都有故願策陽侯勲縮地使相附將無邱與陵吳
楚特朝暮惜哉南服殊千里局庭阼僕本振奇子擇友
及鷗鷺佳遊慰目前一笑失沉痼

上建溪諸灘

粵馬未全歸八閩儼南塞崩洪方疾趨巨石挫而礙萬
石為一灘起伏互禪代疑從太始來屏山觸浪碎忽散
等飄鳬虛際浴微黛縱逸不可羈參伍寫其態雖有百
斛舟推剛力相戴噴空千丈雪束之拳曲內水德本善

柔一怒莫能耐洶洶浩有聲足以激頑憤長年工審勢
奮氣與之對側戛風雷魂逆摩蛟螭背瞬目爭纖毫既
進駭復退艱澀愧利涉功半事乃倍未覺異登車檣櫓
皆歷塊寧無居處安盤錯我所愛百鍊終不辭出險荷
天賚

苦賈

往者登北嶽庫隘愧未稱黑壤育貞松五鬣覆天鏡首
夏尚悽切水窖礙途徑苦菜獨含和青荻挺寒穽采擷

敢告疲實礪齒牙勁茲泣三山隅水族既繁盛上客進
瑊盤肥腍茹餘佞朔南雖兩鄉是物有恒性荒世任奢
取儉者得其正羣營目眩歡難療畢生病野趣滿數莖
執匕悚而敬飽食謝煩憂洒洒夢飛磴重與神人期遐
舉發清詠

瓶山詩

我禾枕川藪有地稱瓶山體非石所作坏土居市闌
羊牧其上童稚爭牽攀既失雲雨潤枯榛穴中間小物

冒嘉謚久假而未還喻彼斗筭質夸大潛相奸遙探漢
武紀整師驅百蠻酒算此由立征利輕痼瘵苟可浚民
脂歷代孰肯刪綿延南渡初境蹙勢乃孱禾城充右輔
扼要如當關人戶頗殷庶貢稅馴不頑設官營權務良
貴出納慳儀狄為我師美醞職所嫺安知杯勺微堪敵
九府園歲長堆斷在冗雜生彎環其高二三仞蟲啣苔
花斑聊供憑弔資登眺則已艱

治王御廣宇軍旅咸就班方斥管商術力馭黃虞還枝

署豈復贅陳跡徒荒閭永為名士宅締造需百鍰魏塘
謹闌入列卉垂烟鬟青泥煩掃除朱楯增編繡嵒阮雖
可追沉湎摧壯顏動發千載愁涕下同潺湲

題東井畫黃葉村莊圖為吳孟舉贈

昔賢畫品重人物近代始用山水奇輞川北苑好標格
白戰安藉膠粉為千年沿襲罕傑制似策款段當金羈
非闕作者腕運薄靈境未遇難力追吳鄉勝跡細如髮
其間坦迤失險巖延陵先生擅丘壑手挽嵩華開階基

滄江一道剪芒忽卧對終日生清漪曲房彷彿美人下
廣庭或與高僧期昨歲我曾掉船入自起酌我白玉卮
遍探竄邈至曛黑妙得神解非掇皮木葉飄飄滿溪路
傲岸恰與秋情宜一別已傷塵事隔寧料復慰胸中思
乃知敏手善體物滿眼蕭瑟經營遲豈特纖毫極形似
意在寫出凌霜姿據坐一揮奪萬卷四方賓客合不離
項子累朝傳畫訣謹師堂構加淋漓平居義不受煎逼
祇取放浪酬心知此莊莊此圖實交儼肯學豪俊徒趨時

兔毫錢歌報陳若水

建安黑窰天下奇，土質光怪欺琉璃。內含紋澤細毫髮，
傳是窰變非人爲。宋家茶焙首北苑，必須此錢相鼓吹。
銀絲冰芽潔莫比，取白注黑乖所宜。誰知往哲嗜淳雅，
目擊彩翠心不怡。求器求才兩無異，力斥炫耀追純熙。
太素將窮秘文出，中山之頽開威儀。六百年間幾灰劫，
兵喧火烈仍孑遺。歲加斑駁異常制，砂痕蝕盡參敦彝。
陳公知我饒古癖，拏舟割愛來見貽。梅檀作室法錦囊，

啓視端可輝鬚眉涼軒酌水敢輕試觀物想像元祐時
緩火筠籠點新鐸拱揖歐蔡瞻清姿陳公脫屣名利場
亦如此殘堅自持席上新珍浮薄子修飾猶恨青黃遲
先民矩矱世難識祝公高蹈慎勿疑

徐器之出所藏宋硯為長歌壽我有眉畫春山
之句戲答

南遊曾鼓滇江舵峽口鉛山青數朶篝燈涸水鑿鴻濛
紫雲垂乳當空墮春星之堂白石遲鷗鶴回光清向我

是時年方四十強欲追左馬相頡頏即今老矣滯海域
皮皴肉瘦髯如霜臨歧蹶步不得騁天寒夜黑眠羶房
晨興絲淚淋漓罷尚磨敗甕雕羽商掉頭不借軍前箸
西風飄動旗亭絮造物與人善玉成重到華門樓隱處
甘持殘齒付縹緲矻矻校讐還達曙徐君念我卽舍窮
好古徒復矜豪雄篋書盡捲入酒肆絺衣兀坐黃蒿中
家有宣和秘殿石墨痕濃漬生蛟龍攢花感結畫流液
骨骼太樸神明豐定經蘇米擅波磔北狩不入葡萄宮

國步頻移貞自若論壽直須河岳同開囊輟贈靡所受
故人與石千秋在滌除肺腑出槎枒又對遙山寫眉黛
君為硯計良未俗豈知綺語干深戒五湖帆影況蕭條
親捧玉環安可再只宜閔跡避三灾真手摩挲長不壞

匏杯歌

酌酒當用黃金樽近年以來貴陶瓦物巧生新定莫窮
易以堅匏更淳雅尚象恒思謀始難西楚東吳無作者
禾里遺風差不俗逸客栽匏滿原野累累結實飽霜霧

夏秀秋貞互傾寫鉅者嘗聞濟險津酒易溺人此其亞
鑒古足藉息流湏目前寓意在杯斚光踰粟玉謝雕鐫
歲月摩挲賤聊且我里魴魚尾頰赤甲乙之間嘶戰馬
故家筐篚無一存挿羽徵求到松檟猶餘匏器侑麴蘖
賓筵秩秩見瀟灑小製翻為四海珍鳳凰鸚鵡徒土苴
乃知治器等治國羣材精猶趨良治不然棄擲老田廬
蟲吟雀啄誰能把

後匏杯歌

郡中攻匏始王氏其後模倣紛然多各能推擇尚堅樸
八月九月留霜柯宣武平生誚形似精微以往皆淆訛
石佛羣生稱好手工惟急就虧揩磨流傳空復遍燕粵
賤售祇辱幽人邁東郊周生最晚出家無尺帛顏常醜
思窮莽蒼得竒竅盡刷詭怪還中和終年黯慘與神遇
歛起奏刀如擲梭不規而成妙天質因物纖巨無偏頗
瓶壘滿眼總適用譬若聖教陳四科其間卓絕首觴噐
琴軒書榻光相摩捧之宜俟倕侏輩侍坐可斥妖秦娥

愚也好古徹骨髓周生之室曾經過持贈不惜倒筐篋
皜若片月來烟蘿南滯閩埂北沙塞塵釜戛擊催沉疴
糟邱已隕謝歡伯不飲奈此匏者何

墮驢行簡星期

橫山山人出無車浩興欲訪鍾山墟葛衣炙日僅掩肝
腹底萬卷聲牙書奇書嶽瀆鮮能載況此風雪橋邊驢
雲昏石滑驟欹側前却俄頃紛趑趄涉足直須冰在凜
坦坦便覺囊智疎仕路艱危靡不有陷阱往往生巾裾

萬物之靈盡如此驢也學步師其餘曾聞倒騎入金殿
蹀躞仍返中條居嘿紙條今皮骨動舊史所紀終荒虛
山人前年宰邕陽侯毒噬不得舒堤城澤國始平陸
遍挽魚鼈歸耰耨豈徒民族快完聚驢行孔道皆安徐
偃蹇竟觸長官怒一朝宦籍遭削除多才自昔召傾覆
更乃傲骨高難鋤瘦驢力薄良偶然未若此輩深而狙
山人熟識倚伏理細事那足煩嗟歎長干六月暑氣合
晝橈宛轉銜清渠三日行藥兩日卧趨健不異少壯初

慎勿悔此暫時失詩腸遠使添鬱紆苦吟驢背古有諸
且畫霸橋風雪圖

星期墮驢後意氣彌壯喜而作歌

鄭公騎驢踏水雪山人做之在暑月觸暑江關途路長
那免塵埃生一蹶鳴聲粗急極可怪晉賢聞此翻叫絕
好尚從來不可齊若輩要知非俊物山人炯鑒端在茲
扶攜顛覆將屬誰負重寧無千里骨致遠良藉層霄姿
街亭統軍敗蜀績陳陶流血傾唐基用才衡量各有分

大小倒置鴆毒隨前車之戒亦仁愛山人好遊終不悔
輕裘側帽轉風流緩鐙垂鞭多意態真成詆驢被驢笑
栖霞山色方清峭凍蘂含煙應候開飛觴石上叅孤嘯
回首天門光若拭高軒八駟能者得日暮徘徊古道旁
我為山人重太息

答林坦庵

當年謫客喜投閒困頓戎車又入關天下可懷惟老友
生前能踏幾名山常因赤子勞心計擬借青春拭鬢斑

別業橫塘松徑遠何時蠟屐訪潺湲

以枯銀魚飯客伯駒曰是少陵所賦白小也予

謂少陵不及枯者補十二韻

入筯連千族寧嗟盡取難封題離密網瑣碎侑加餐飴
覺霜條短箱餘玉縷乾勁如驕骨鯁名畧慰饑寒小品
撈波得微生曝日殘非鮮仍水錯為腊類蔬盤乙去針
芒細苞來道路寬製常因市賈餉豈藉漁官圖贊當論
寸刀砧荷獨完自須班脯醢不復戀波瀾廣吏懸無策

高門缺再彈娛賓聊佐酒笑比素絲看

攜李四首

淨相僧房起盛名徐園舊價頻教輕嘗新一惜潛夫齒
嚼出金鐘玉磬聲

漉水蟠根奕葉長筵前水齒得仙漿上林嘉種休相借
驗取夷光到甲香

膚如奈子能加脆液較楊梅特去酸江北江南無別品
傾城傾國借人看

青綃圓轉密交枝
遶蒂中懸玉一絲
莫怪幾回停食指
傷心吳越被兵時

病中漫興三首

年少逢辰定出遊
如雲駿馬絡吳鉤
休將舊日紅樓意
攪起山翁夜夜愁

借書南北久忘貧
暖意雖回不記春
勤埽松毛烹甕雪
此生端合是詩人

鰲磯勝與鶴洲鄰
雙槳尊香下釣綸
祇是金陀扶病叟

不曾孤負故園春

雜憶平生詩友十四絕句

鼎鑪有耳玉為盤周雅還登上將壇遼海鶴飛曾不返

浮雲相望路漫漫

陳素菴相國詩集名浮雲

文采風流壓萬人舫船動處墨花春于今無復凌霜手

落鳥絲眉網路塵

龔芝麓宗伯每讌集必與客賦詩

杯闌角韻雁門陰廿載綢繆縞帶心自捧

天書將母後斗杓高坐萬山深

李天生甫拜官即歸養母詩為海內第一

蛾眉自昔寵難同，敢信天家結網工。
挽盡南朝新調弱，

松陵傑士氣如虹。

工滿次耕近有
貶官之耗

五嶺曾看續楚騷，名家更拾錦成毫。
參差那得聯征袂，

綠柳城邊響夜濤。

聞梁藥亭名
未與相值

分部甘陵起愛憎，人間甲乙事難憑。
男兒也叶秤量夢，

文選樓中半夜燈。

鄧孝威有
詩觀之刻

落紙隨人換酒錢，雄才合在楚雲邊。
一生慣得安心法，

懶向衝波駕鐵船。

杜子皇詩
自為一格

學成早歲謝軒車，偕隱花林俠有餘。特向峰頭尋俊語，

具區千頃浴芙蕖。

葉已畦進士
高蹈山中

情芽本易惹閒愁，翦翠雕紅未肯休。別體江湖成日下，

西崑翻訝少風流。

近時詩派推二馮兄弟
沿襲西崑為世人所尚

好奇爭欲逞新裁，元祐頻令入管來。恰似賞他春色遍，

雜花還向野亭開。

長安舊侶
頗尚宋詩

艷才驚目五茸城，結社珠盤盡有名。堪怪酌身堅似鐵，

韶年偏賦綺羅情。

雲間自陳夏兩
公後稱詩極盛

婁江學士擅風華璧玉光中驟王駟重唱鐵崖新樂府

倩他紅袖拂琵琶

梅村學士詩
稍闌八元人

東南空谷少同條剩有幽人卧碧霄松葉滿庭秋磬杳

夜牀誰與聽芭蕉

文可禪師談詩
最契今已矣

野服從來拙自知胸中木強未隨時鴛湖百頃水花滿

乞與先生下釣絲

余白
喻也

客子貽燕京春詠讀之感懷四首

烟月無情兩鬢秋禦兒亭下繫歸舟多時不屬垂楊管

重為春詞惹舊愁

晴沙小隊玉驄鮮
屢見朱樓換舞筵
縹緲仙風吹不絕
尚留金掌似當年

桐乳琉璃法釀開
紅霞密砌擁瀛臺
別煩楚調含蘭手
剪取西山黛色來

漏寒遺怨入琵琶
宮體題成護絳紗
三十九年如電抹
因君惜取鳳城花

胡教諭明遠

明遠字子迂號九玄

本朝改崇德為石門遂為石門人天啟辛酉舉人崇禎
時舉賢良膺徵辟以親老辭不赴順治初秉鐸衢
州開化縣再補台州之仙居有壽花居詩鈔

自吳興歸遇大風舟覆前山漾中逾刻賴救獲
免既而飲酒頗爽因作覆舟歌同患者郭彥
深范翠華兩孝廉

黃蘗山前黃風惡白蘋洲邊白浪作風狂浪駭拍天來

萬斛之舟如屈蠃吾舟一葉輕于鳬安與蛟龍爭馳驅
快哉莊生千古論五石之瓠浮江湖自喜踈狂急欲寫
操舟惜非長年者捩頭車子揚高帆迅如落鵲疾奔馬
一局殘棋尚未終翻身忽落水晶宮誰言至人水不濡
左挾馮夷右弓隆相國池頭雨初住蘇公潭西日將暮
鷗鷺敢擬大鵬飛竊慕風流趙子固蘭亭至寶性命輕
愧我唯餘折脚鐺死生雖大曷足痛一笑掀髯鬪酒兵
大瓢小杓頗自適餘生何異逆旅客中秋明月滿西樓

狂問青天眼空白

弔高陽孫相公

公諱承宗平生敦好學問崇尚氣節崇禎戊寅高陽城陷闔門

殉難

雪鬢霜髯氣尚雄丹心不沒五湖中台星忽隕埋黃石

元老云亡感白虹三尺藐孤麟鳳在

公殉難之日祇逃六歲幼孫事

詳行狀

六千君子鶴猿空九原未了平生志松栢長生謬

謬風

屯溪

溪雲水綠白不辨山與水濤聲疑天風身在雲霄裏

桃花洞次縉雲李若戾韻

古洞如斗室雲深鑠不開桃花亦仙去遶徑盡蒼苔

題節義顧仁陪祀忠節公像

仁為華州姬忠節公文肩門役公知

滕縣事越五日而蓮妖難作城陷公投繯死以印屬仁仁拜受歸與其父藏之遂同公死妻高氏聞之亦自盡事上聞特恩褒異仁與妻並祀公側

翩翩年少髮初髧仗節何曾愧昔賢下走莫驚陪祀典

岳公墓上附施全

葉舉人方宸

方宸字遇之平湖人天啟辛酉中式旋丁外艱絕
意仕進與兄方寰鼎新報本塔樂善好施里中稱
葉氏二長者

同瑞芝兄遊乍浦諸山

疊石栽松各有儕並欹石背拂松釵成連海畔攜琴獨
何似漁樵一醉皆

徐學訓柏齡

柏齡字節之號殷長嘉興人弘澤子崇禎庚午舉
人受知於黃石齋石齋贈詩云節之貽我詩十章
文情脫洒筆睨古今鐘鼎如鵠掇放浪遺形骸瞻
眺留日月不作悲離音不著窮愁筆不蹈辟支禪
不弄飛騰術蕭然寄天地風雨絡膠漆授訓東嘉
甲申後往來閩越間歸卒有勗光樓集

題王鐵山房師桴園

葦岸荷堤晝不醒板橋書檻傍烟汀飛來鳥似眠沙慣

許廷字靈茂海鹽縣學生

崔貞姑廟

野塘臨練浦祠屋類團蕉近社初聞鼓開門側近橋靈
衣金粉蝕烟帳蕙蘭銷欲采蘋花薦迴波一水遙

計秀才善

善字廉伯嘉善人性倜儻博極羣書家貧以孝友
聞有宜園集

龍光吟

黃輿之英化金鐵飛入洪爐煅霜雪擬將銳采照人寰
指定風雲見澄澈越工歐冶親為之秦客薛燭稱絕奇
錯鏤金環鎖瓊匣龍吟幽寂誰能知便向豐城同獲屈
紫電凌霄訴沉鬱司空固是神明君拔出重淵表靈物
太阿感泣龍泉愁此恩卓絕何日酬及鋒當為知己用
清光騰躍風颺颺即今牛斗輝天宇猶憶司空求劍處
千古英雄一片心試看三尺秋波去

贈張潔宮先生

舌在輕為相身閒忘列侯未酬黃石畧先愛赤松遊坐
竹觴移月看蘆柁弄秋曲江風度老祇合韋編求

題菊

自憐霜節計蹉跎不向春風照綺羅栗里醉來山氣夕
洞庭愁去水曾波清芬歷歷傳高士寒影垂垂對素娥
一自白衣成往事空餘山徑獨悲歌

從軍行

羽書昨夜發諸營匹馬交河踏雪行收得思鄉未乾淚

八雲孤角又三聲

程汙陽于古

于古字範卿號谷簾秀水人明末以貢為汙陽知
州有谷簾集詩思峭刻是欲效孟東野而去其訴
窮嘆屈者也

得山中書

撥火圍爐伴歲闌又驚書信過江千山中漫說雲如絮
不護山人永夜寒

龍坑先生程觀生

觀生字仲孚嘉興人其學研精於易自漢以來所
閱註疏詮釋凡二千種

送魏忠節至京口

蹶蹶披玉綸鐵木憑其身萬族爭耳目哀呼徹高旻堪
恠彼何為涕泗一何真三代直道行或者嘗不泯念此
感生平介介以為珍雖無回天力風化闕其人

夫子今行矣鄙心胡能為滔滔江水逝瞻望須臾時迢

遙三千里何由接清姿六月氣如焚械梏安可支持有
冰雪心化作清風吹況乃精貫日鬼神將泣之

褚舉人廷琯

廷琯字硯耘亦稱研民嘉興人崇禎癸酉舉人居
角里以善書名於時

乙未正月十四日沈仲方過我留飲即步元韻
雪殘當戶虛生白林際微明見遠山月映中庭空似水
人如孤鶴老逾閒梅花入坐成三絕畫舫延光蕩碧灣

小室名
春水船

贏得夜深多況味此情與子最相關

題畫贈禪友

四月鶯啼綠掃天蘭香筍婢柳含煙竹風瑟瑟催微步
花氣濛濛撲畫眠山出夏雲昏欲雨亭臨秋水坐如船
知君好事多幽勝與爾相期共入禪

鍾侍郎鼎

鼎字梅城石門人崇禎丁丑進士順治間官太平
知府歷陞廣東按察使入為刑部侍郎左遷陝西

副使

夜遊虎丘

古寺藏林丘乘興夜登陟金虎有時銷愛此舊月色

顧秀才問

問字去疑桐鄉人少好學晚年以方書活人年八

十終

贈桐溪日者張宿之

知君本是赤松流偶作人間汗漫遊識邁九師玄獨剖

爰分三畫秘全抽清風入幕頻揮塵白日侵簾半隱鈎
每與問奇開妙義百文常掛老鴛頭

朱樂陵萬錡

萬錡字潔湘桐鄉人少見知於張溥崇禎丙子舉
人入

國朝除山東樂陵知縣著歸來日注并惠風堂集

僧房看蠟梅

風光浪擲惜年華已見新黃作異葩仙骨夜涼偷玉笛

小香冬暖透鮫紗座無雜客妨佳句庭有幽禽守凍花
都說上陽金谷好如何及得老僧家

袁貢士袞

袞字丹六嘉興人與范驤朱一是為文社知名於
時

題海昌北城樓

東南佳氣鬱樓臺畫棟霞連睥睨開吳越星分從檻出
江湖水合抱城迴烟含萬樹天邊盡浪湧三山海外來

此際臨風瞻北極五雲深處是蓬萊

徐秀才濟貞

濟貞更名贊宸字湄棧海鹽人忠烈公季子有霞
蔚軒稿新舊可喜又嘗集海鹽先輩詩曰海谷遺
風集

春日讀書山中

隴上紫雲飛池臺積翠微山磬香未歇石鞠種還希
翦水呢喃鳥盤峰薜荔衣門前清露重幾架溼薔薇

漁浦野眺

長途寂寂越山前日暮孤征見輞川
牙檣銀篙飛鶴渚雨蓑風笠捕魚船
溪邊落木三江地城外歸帆半霧天
漂泊只今嗟已甚滄洲不斷有荒烟

汪司幕硯玉

硯玉字樂卿號玉水嘉興人明末以貢官山東鹽
運司幕職有鴛水月社篇西山品蠟屐音樹石異
綴諸刻

學繡塔

胭脂水色浸浮屠為識夷光已沼吳不數迴文挑錦字
偶成浣帛孕明珠柳顰絲絕安柴辟花費針神賜屬鏤
果証摩登伽位上七重寶樹鎮嘉邪

蘇小墓

無限春風無限情千年猶想碧油輕歌殘井畔桃花落
舞剩亭邊柳葉生漠漠香魂疑月影茫茫玉質斷雲橫
仙才山色何曾死不獨錢塘夢得成

項氏所藏管仲姬竹卷友人得之已斷後跋忽
有得其題語者為中峰及松雪兩翁手蹟時
反疑為贗作為賦一絕

露葉烟梢幾幅攤晴窗影落石泓殘堪嗟重合延平劍
却被人間兩樣看

陸舉人上瀾

上瀾字芳洲號狂生平湖人崇禎丙子舉人為文
古奧年八旬日居荒邨手不置卷所著詩文集并

閒齋志林南渡野記湖邑記聞王鈞小史諸書我
湖稱博雅者近代以來未之敢匹也

和汪晉賢悼其小姪女金媛

有寄生
畧紀事

雲外來清影花間拂繡茵勝無憐早慧希有念前因玉
碎天門謫龍歸水府新白衣先受記仍侍畫中人

輓俞烈婦

一時薄命總雲煙誰向霜秋唱可憐古戰場成埋玉地
衆香國覩散花天六千短後隨潮遁二八修蛾捍刃殘

如此貞魂堪慟否芳名獨藉大家傳

附考俞氏庠生君振女進士張樞次子豹烈妻丙戌
五月二十日山中白寇猝至張家西廊下氏匿竹叢
中既被執欲挾之去不從以刀擊背且牽之出牆刀
躍墮塹復迫之攀樹大呼曰若不速殺我終奈我何
寇怒所一刀撲地殞絕

元旦四首

冰車纔歇又香輪雲卧荒邨自在身百戰曾經窮甲戌
六旬重得遇庚寅未除土石愚公谷無恙風帆妬女津
屈指春田蒼翠滴提壺行喚踏花茵

南北驅馳今倦遊，蒼茫雲物祇浮漚。
自甘老婦身藏繭，笑看時賢氣食牛。
欲撻梅花尋竹石，漫調鶯語佐瑩篴。
未知何處烟雲滿，小白長紅遍綠疇。

歲華取次寓閒身，未辨分行主與賓。
青眼自難容俗物，蒼天原不愛才人。
書成廓落同耕石，年少推排類積薪。
花鳥憑欄供逸賞，浮名何事逐風塵。

客冬層雪滿槎枒，春乍霏霏林影賒。
清韻不須煩水遞，寒威未肯放梅芽。
曾從觀獵驚談虎，無計搜林學捕蛇。

此日閒吟聊浣俗墨痕點染亦生花

漫興

昨夢如今醒未閒庭明月窺人老子興復不淺烟鋪草
藉花茵

竿竹亦稱竹林拳石聊呼石丈我意正不在多衆譽何
如孤賞

誰言天上無憂但許人間如願閉門半帙殘書對客三
行晶飯

清泉浴雨潺潺白石耕烟齒齒且尋栽柳先生勿問種
桃道士

蔣伏羌薰

薰字聞大號丹崖海寧人嘉興籍崇禎丙子舉人
國初授縉雲縣儒學教諭康熙癸卯陞鞏昌府伏羌
縣涖任二年以賦詩立碑被劾歸里有塞翁編

擬古

有客唱白雪豈惟和者稀下里會成羣顧曲紛是非奈

此數千人孤響何因依縱鬻秦娥歌梁塵空自飛使非
謝安石捉鼻當見譏

馳馬長楊道小隊列圍場蒼鷹兩臂鞬寶劍鰐魚裝雕
弓白羽箭走狗亂無行灑血空禽獸飛揚誰家郎獨有
中牟宰馴雉不忍傷觀政非肥親讒言反為殃

效李賀傷心行

憂接如懸絲脉脉悲秋素落葉點散裘迴風嘯急雨古
劍苔花綠不平鳴欲舞月出照羈人牀下寒蛩語

羌中風土詩

十首
錄二

少陵入蜀思華為言形勝美風土惡其巫峽蜀江
比之華嶽黃河美矣若風土之惡詩人不忍斥言
三百篇美刺並列何以訓焉予仕羌寓羌留滯未
歸為著風土詩庶幾太史採陳悉茲民難不獨後
之遊者將有感於斯章

地瘠民如寄窮鄉半古莊

無人居
曰古莊

開荒聊種麥嬾織不

栽桑寒水魚無樂春山草尚黃耕田難得獲更覓禹餘

糧

少婦氍毹飾重窰閨閣深插花叢綠鬢解繹受荆簪

女先

適人始解繹

傳溺楊妃粉投鞋卓氏琴

以溺塗面取其光潤孀婦再嫁不憑媒妁

投鞋報帕為訂

鄰家聞夜哭幾處白頭吟

寧河王鄧愈祠

將軍麟閣與雲齊絕塞荒祠落日低不是桐苔尋斷碣

更無人說鄧征西

愈為征西將軍直抵崑崙山封寧河武順王

登鎮邊樓次解大紳先生韻

學士思親幾度秋

大紳謫河州衛吏有隴樹秦雲萬里秋思親獨上鎮邊樓之句

塞翁

去國更登樓百年遷客遙相望白水河西定白頭

朱上舍茂曜

茂曜字子蕃號惟木天啟中補嘉興府學生承蔭

入國子監晚栖心禪悅謂人世大夢錄古今史傳

及所見聞凡夢兆之可徵者號徵夢錄暇賦六言

詩積累千百沒後其稿悉亡

人日過伯兄貴陽守放鶴洲別業是宋朱希真

園林舊址壁上題高工部詩戲作

舊業朱三十五曾種梅花滿枝恰喜艸堂人日高三十

五題詩

希真達夫俱
行三十五

題畫小言

有序

冬日施水菴居韻石山兄出華亭瑩公所贈無心
出岫圖見示乃戲為隨意拈咏菴為墨林先生昔
年習靜處題為色相一樓月聲聞雙樹風因并識此
清淨吳牋逾玉興酬筆落雲屯此處那堪無屋宵來移

到南邨

比屋可封之俗歸來不是無舟坐看今春又過鄉心遙
挂浮丘

鍾秀才諫

諫字惠遠後更名啟秀水人順治諸生

觀吳巨手畫歌

吳生高竒世無匹眸子炯炯當秋日文苑風流自許豪
閉戶窮愁人不識少年百事皆能工畫畫一日來神功

江天瀟灑勢獨出蒼蒼咫尺千奇峰細莎軟草江頭綠
山靜無言流斷續空讓陶潛歸去來雞犬桑麻武陵曲
吳中先輩沈與文揮毫疾走追其羣一時翰墨照光采
九天唾落春空雲吾觀此事非小術吳生下筆重心得
今時作者但寫真秋毫豈是神明力悞落塵埃二十年
時聞雲水思悠然對君此畫不肯住從買山陰道上船

十載

十載如今日長年亦苦愁草深周子宅月散庾公樓弄

笛招黃鶴疏池引白鷗平生江海志雁鷺野塘秋

沈舉人日昆

日昆字以白號九掌平湖人萃楨長子崇禎己卯
舉人沈靜恬雅無貴介氣弗計家人產

國初授縣令改學諭未仕卒

南徐道中次查子宣二南叔姪韻

長途屈指半淹留猶喜高歌度晚秋夢遶河山應化蝶
人衝風雨似飛鷗關前只望浮雲滿泗上徒悲逝水流

阮氏才名今更重相逢何事哭窮愁

王同知睿

睿字聖若號愚谷嘉善人崇禎己卯副榜

本朝授福建興化同知多善政有曠期堂集莆陽稿

餞羅篁菴少詹致政歸里

何事承明客飄然謝帝京
賜金明主意祖帳故人情
匡嶺聞琴曲瀛臺憶履聲
幾時傳尺素千里問王生

送沈一指之任高陵

新除大邑復秦關左輔仙臯別上班自按紅牙歌白雪
好斟綠螳寫青山龍門髦士車爭御鹿苑兒童馬共攀
兩度送君情轉切多因別恨損朱顏

哭凌日旦

老驥鹽車雙耳垂英流天絕更堪悲却將冀北窮途淚
併向山陽笛裏吹

鈕漳浦應斗

應斗字宿府吳江人秀水籍崇禎癸未進士任漳

浦知縣

平波臺

積水明千鏡中流峙此臺雲從湖岬落浪湧寺門迴柳
外千帆去沙邊一鳥來昔年題咏處古壁滿莓苔

汪進士挺

挺字無上更字爾陶嘉興人崇禎癸未進士高尚
不仕書法似歐陽率更年六十五無疾而逝有曾
城遺稿

朱太守鶴洲草堂落成同諸公讌集

澗紆巖削徑初成
雅稱歸來物外情
近郭門無軍將打
過橋龕有佛燈明
雙栖烟島昂藏鶴
獨轉風林斷續鶯
敢謂幽蹤希二仲
深煩折簡費將迎

魏封君廷薦

廷薦字無咎
號友莊
忠節從弟
少為諸生
以子學
渠貴贈朝議大夫
有息踵居集

家子一畫淵明采菊圖見貽戲作

茅屋四五間脩竹一二畝東籬繞曲折南山安戶牖芙蓉既盛開菊又當重九此際陶淵明寧無人送酒

張貢生賡奏

賡奏字道柯嘉興人順治初貢為江西藩幕有紀遊詩黎元寬文德翼序之稱其感事悲涼有古人之致

送友從軍

秋風此日挂弓情一劒書生仗策行天柱江流鳴塞角

燕山夜月駐秦箏軍麾南下從王粲羽獵東巡薦馬卿
重典新開麟閣待幾時齊看海雲平

曾畫士鯨

鯨字波臣閩人來居桐鄉青鎮善丹青寫照妙入

化工

梅花和尚塔

每從清夢憶梅仙杖履尋幽破曉煙奇石尚餘高士節
寒花猶得野人憐乍看青過春塘草却恠香生陸地蓮

我有幽情懷隱去蹉跎還負入山年

胡太學夏客

夏客字宣子一字鮮知海鹽人震亨子博極天人
凡七畧九流無不閱覽好模周籀秦篆雖竹書漆
簡邠豳啟虜彝一見輒辨其年月有谷水集

題楊妃吹笛圖

玉笛玉環吹掖庭李三郎和李暮聽險程蜀道辭同輦
芳訊仙山感二星樂府罷歌胡韜子梨園新曲雨霖鈴

馬嵬千仞清秋月曾照蛾眉向翠屏

遙和李因仲孝廉灌園詩

破廟隣僧勿習禪相尋白話共陶然看春罷亞如農老
特煮黎祁供佛前細摘棚間垂綻豆輕划甌去採鮮蓮
歇勞儘嘆茶滋味留得迎梅雨賽泉

留姚當世小飲賦贈叔祥先生嗣也

海山靈秀啟真源同調同時破俚言七子齊名爭日月
一編傳世繼乾坤平生久快心期合後嗣都傳手澤尊

八十年來壇坫在通家異代復寒溫

海鹽石隄歌三首

海潮頭起與城齊百萬金錢築石隄
隄路逶迤三十里
襄陽枉唱白銅鞮

石隄自北接秦川最盛觀潮八月間
隄內白洋河一道
畫船簫鼓那曾閒

到秋水母圓如蓋白蟹擎螯筐似輪
賺得遠方遊客喜
歸誇海味向鄉人

江南曲三首

劉黃花馬夾淮邦高鷄翻山直到江天塹一時增設險

侯藩四鎮列旌幢

大帥高傑號翻山鷄劉良佐號花馬劉與黃得功劉澤清皆封爵鎮淮陽

國母纔從土告迴貫魚長信詔新開莫愁爭抵西湖好

選淑欽陞御史來

選后已徧金陵遣中使至浙選良家女相傳彭某陞浙江巡按以佐中使

六院笙歌已沸天內家舞隊更翩躚庭花舊曲不堪唱

司馬新編燕子箋

宮中教習優伶少司馬阮大鍼新劇名燕子箋

屠教授爌

曠字閻伯嘉興梅里人為諸生從遊甚衆客遊死
于粵東有勗齋稟

古意

素絲非一絲機中織成帛卷舒生容光從郎自搖襞慎
勿染為緇終身不見白

贈別袁重期

高飛鴻雁滿關河此日寒江起夕波庾信哀時常作客
梁鴻去國獨行歌霜淒茂苑清砧急月照荒臺落葉多

為問吳中舊知己空山叢桂近如何

東湖遺老錢士馨

士馨字穉拙復名𣬛字穉農平湖人崇禎壬午貢
入南雍見知於吳梅邨尋入燕公卿爭欲客士馨
士馨久而厭薄之人漸目為狂生李自成將逼京
城中允李明睿疏請南遷士馨私謁之泣曰賊已
盡得秦隴日夜行四五百里倘聞南遷之事以輕
騎繞出畿南突犯警蹕公將何辭以謝天下明睿

慙懼無以對及京城陷士馨匿跡樵林流竄于兵
火之中艱難辛苦無不備經多寄託於文章後奔
走無所成貧益甚自彙其騷賦詩文為一集然貧
不能剗廁遂散佚畧盡今所存者零璣碎玉耳士
馨輕財好客工古文詞兼精書畫每抵掌古今必
縱橫數千言卒至窮老以死亦可哀已

秋雨感懷

自愛尋溪躡屐看獨傷萬木到秋殘青螺遠黛千山黯

白練澄江七月寒歸燕已辭梁上盡鳴蛩還向草中聞
乘流晚出橫塘水贏得漁蓑綠未乾

暮春畫溪柳垂隄送溥子南歸

楊柳芊綿水照隄三千故國一青絲送君愁疊陽關唱
但寫垂條記別離

黃解元濤

濤字觀只嘉興人崇禎壬午解元出陳子龍之門
國初為龍游教諭遷滋陽知縣未仕卒有槁李古蹟詩

秋蟾墓

六里離龍墓迢迢兌脉長滇池分貴族仙術費長房

附考宋嚴處士賣藥秀州遂家焉墓在蒯塢坊

烈女河

市井雙閨秀臨危大義明天留一節在人誦二貞名

附考至正戊戌紅巾至氏錢子順二妹結裾投河死河在州治後橋下其嫂俞氏亦守節洪熙時表為二貞一節

景范廬

新膽沼吳宮主憂臣辱同淳熙景范客志在滿江紅

附考在金明寺後宋淳熙戊戌狀元姚顥築有喬木
參天幽若山谷向為項氏別墅今屬曹司農溶額曰

鐵舟姚有滿江紅

詞二闋傳于世

石笋夫人廟

地實有情生笋女如介石為神白苧都中賽社賣花村

裏尋春

附考府城東南石笋自北出窮
其根不可得土人立廟祀之

義婦坂

烈女從夫矢不更丈夫感激自成名報仇死節非容易

天遣黃巾葬呂榮

附考漢呂氏女名榮由拳人吳許昇妻勸夫力學應州辟為盜所害州捕得盜斷頭祭夫黃巾欲犯之不從見殺大風雷電賊懼而葬之太守廩豹為塚于由拳郭里墟北

花月亭

多花少月何堪愛月好花殘更欲愁每羨倅州張子野
一亭花月四時遊

附考宋張子野倅秀時創亭取雲破月來花弄影之句

朱舉人一是

一是字近修海寧人崇禎壬午舉人僑居嘉興之梅里有聲譽三吳文盟推為領袖有為可堂集

觀五重所設水柵闕廂有嘆兼悼其弟緯光

戰合三千騎關封十八盤亞夫真將種行已本儒冠論世憑多口亡家痛二難紫泉流不盡落日水聲寒

懷楊彤宣

萬里投人急遊魂道路長河纔過玉斧山忽見銅梁節

鉞開新府綈袍檢舊裝懸知今夜夢君會到錢塘

雜咏

旌旗縹緲鼓聞闐澤國揚波勢蹴天幕府防秋新築塞
樓船跨海舊衝烟田橫結客真多事楊太稱兵更幾年
天命有歸爾何益時看戰骨一潸然

遊虞山

輕舟十里泛平沙雲外虞山一半遮隄勢遠迴言偃墓
草根青入仲雍家野泥初坼未開筍溪雨欲流將盡花

乘興不辭今日醉此身誰記在天涯

虞舉人相堯

相堯字在欽給諫廷陞子崇禎壬午舉人

國初以母老陳請終養有復旦堂集

聞雁

白露下庭柯拂拭驚衣薄燈昏影倍親
窓虛月易落飛夢逐文鴛清聲擬鳴鶴
知從故里來無書慰寥廓

駱馬河阻風

四望郊墟絕暮烟停撓躑躅路難前杳無漁火堪呼渡
賸有鯨濤欲拍天雨滴衾裯水作伴風搖檣櫓夜如年
自來不得江神助阮籍窮途豈偶然

除夜感懷

一宵迎送問如何竹報平安獨寤歌半世浮名疑畫虎
全生拙計學藏螺詩因慵懶無心祭鬼避清狂不待儺
往事華胥空記省五更庭燎動鳴珂

浪擲金錢卜大刀絕裾未忍擁星旄灌園何事營三窟

攬鏡爭看有二毛
短笛笑吹青玉案
斜封恥進鬱輪袍

新恩雨露弘將母

感馮中丞郁大理得請

折得梅花當木桃

莊封君日思

日思字汝立號立初學正嚴子崇禎時副榜貢以
子鑄推恩封中憲大夫有四書尚書說準白苧草

集

山居

一自山居後塵心滌幾何疎林人跡少峭壁鳥聲多天

迥騰黃月溪平綢綠波那知蘆荻裏鷺地發漁歌

晨起觀雪用鱗兒韻

浙漚驚殘夢推窗白滿枝光搖疑隱雀風拂似垂絲極目雲山幻遙看天地奇蕭然無一事相對洗塵思

籬邊聯句

有花盈架不愁貧

立初

花亦當筵澹蕩人

巨觀

晚節凌風能

玩世

元子

幽芬帶露自含真

抑園

欹斜似笑三分醉

堯夫

嘯傲

常空萬斛塵

宿

一自籬邊同賞後

幼陳

秋光佳處即陽春

東曙

李教諭新枝

新枝字森若肇亨子崇禎壬午舉人康熙丁未就
教棄職終養有淡巖小脉

和新室落成

卜築臨清渚柴門愜素心無山路自轉有樹境偏深博
物搜奇乘怡神托藝林蕭然獨高寄慕古欲忘今

題畫與魯千巖

葉落深林見遠山山前虛閣小灣環溪翁有約來相訪
先度清吟出樹間

芾園先生朱茂院

晚字子芾人稱芾園先生太傅文恪孫崇禎初補
嘉興縣學生甲申後棄去教授生徒先後著錄者
百人故友邱岳以子相托浮海入粵轉徙閩南而
死晚視若己子為之娶婦教以學文居室三楹書
籍釜鬻鹽豉蒜果雜置几案客過或自執爨徒步

闌闌中手自攜持菜把遇之者不知其為三公後
裔也有顧頴集

讀陶靖節集

人生兩儀中形與影相親雖曰勞逸殊好醜豈不均形
影莫贈答贈答辭苦辛賢愚等湮滅醉者詎千春衆輻
共一轂有以無為珍思慮濶然空但隨時運淪至矣柴
桑訓形影不如神

沈太學章

章字宗玉一名璋居嘉興之白苧邨有魚梁藕花
淑水竹灣諸勝皆自為題咏集名苧莊頗能拔俗

淮陰侯祠

淮水十斗泥半石行人入門三歎息王孫功高天下疑
赤龍雌雉俱慙德前有渭水後桐廬進則不足退有餘
曷不歸釣城南魚

靈谷寺看梅

下馬看碑度孝陵山椒十里樹層層半開香氣清於水

一路人家靜似僧春動粉鬚都化
蜨夜寒花片欲成冰
無煩襪被薰燒燭月白烟黃睡未能

隋隄懷古

烟火春隄翠黛連垂楊不綰舊龍船
阿麼曾濺風流血
一樹瓊花變杜鵑

邗溝新碧晚濤平楊柳曾遮殿脚行
誰道雷塘歌吹歇
月明重按玉簫聲

廿四橋邊颺酒旗玉鉤斜上草離離
風吹一陣梨花雨

又是江南寒食時

姚秀才佺

佺字山期嘉興庠生居於吳有抱經樓諸選其已

刻者註釋昌谷集嘉隆七才子詩選詩源初集

聞鵲

何事催歸鳥鉤輈喚我頻故園經戰後歸去巷無人

孫貢士一駟

一駟字天卿秀水拔貢生有硯隱居集

重過高工部寓公西園

十畝閒園舊板橋
道南重過黯魂消
秋花黃蝶猶成隊
曉露紅蘭惜易凋
事去英雄時坎坷
年來車馬巷蕭條
靈均一去何由返
空對江潭賦大招

張秀才履祥

履祥字考父
桐鄉縣學生
其學一以鹿洞為師
仁宅義根言規行矩
間作韻語有楊園備忘錄

題屠處士壙邨居

霍原六聘山焦先三詔洞漁子定迷津只莫桃花種

徐太學仲選

仲選字華海一字鶴友海鹽人國子監生有鶴友

詩稿

水邨

照檻晴光眼未迷瘦藤斜影度橋西沙頭白鴨黃鶯睡
籬畔竹棚豆架低屋似魚船疎荻繞亭如僧笠穉松齊
此鄉風景真堪戀只合攜鉞老菜畦

沈太學原淳

原淳字伯淳平湖人明末由諸生入太學與陸叔
度諸公友善多酌倡之作兵火以來後嗣凋落遺
稿無傳殊可嘆也

乞衣

五柳先生詩乞食乞衣我亦賦哀情一堆敝絮封雞骨
半卷殘書擁墨卿堪嘆鶉隨原憲老誰分緋使范睢生
孤邨僵卧無人問冷落芙蓉照水明

徐秀才淮

淮字愛竹嘉興庠生有愛竹軒詩

宿金粟寺

昨歲曾遊此莓牆墨尚新雨花長似粟觀海更無津下

榻便行客烹茶費主人年來稀戰伐鼙鼓但迎神

鼓係孫權

所留

沈秀才文輝

文輝字履亨嘉興縣學生有瓜田遺亭

西莊


乍喜人烟接都無俗客喧
漸能諳稼穡不復厭雞豚
仄徑苔梅古疎籬竹屋存
東塍近僧院清磬報黃昏

戈金湯

金湯宇帶如平湖人郎中用泰子

郊遊

雨過青山碧四圍
春風輕颺百花飛
極知良會非容易
馬上何妨酩酊歸



樵李詩繫卷二十三